

飛金晶於靈洞遠內外之水火合上下之刀圭元炁周流感元黃而玄珠光耀包藏宇宙舍金丹而寶用無窮是知天地之獨尊變化之無形無質乾坤之妙道生死之無始無終道勿遠求不出戶牖觀之者鮮遠之者多素

本志真甘樂亡於泉壤入邪捨正徒負夏以經冬靜以生強安而思極七情鼓扇陽絕陰生而性命危六欲觸耽精散形離而神炁泯五藏摧蕩九竅閉關靡知性命之端安得奇耦相配何明造化豈辨玄機吾啓大慈願授仙子將茲神炁集號玄章故名靈寶之筌蹄以應真經之內法付于妙行出世度人化現十方名號非一編諸經典徧滿恒沙句句為玄頭頭是道悟茲妙理則入生出死而與道俱存于此真機則離合自然而去來无礙遇之者夙非凡骨行之者累世真仙悞謫人天慮差覺路指名圖定證悟法門行者秘藏了真可度謹序

靈寶无量度人上經大法卷之一

八明開聰品

玄師曰靈寶大法乃元上大羅元始天尊所說玉宸道君五老上帝高尊上聖妙行真人十方神王至真大神所受後聖玄元

金闕高真天帝行化下教世間得而聞之乃是三十六部尊經總萬八千篇衆道之宗玄淵優奧與萬法一貫

一則明元始祖炁從何先化玉字接靈寶玉字內音經云自三炁之先溟滓之後其中真精欲化挺生元炁元炁之內有神曰元始天王其炁混凝與元始同生流化結芳非色非相或舒或張至延康開劫一炁分形而為二炁虛无自然而生始炁二炁交結凝相太空彌覆无極字方一文八角垂芒莫知其理二炁混凝包藏玉字至龍漢開劫元始天王分鍊二炁混沌開光炁清高澄成天炁降積淨成地二炁分合中有和炁名曰玄炁亦曰大梵之炁至赤明劫元始開圖中有真陽之炁化為洞陽之火元始運洞陽之火冶鍊三炁

混合玉字而成赤文因而劫號赤明文號赤書玉字是茲理也

二則明生育混沌陶冶萬範自混沌開析三炁成文火鍊為赤書光明之炁陽光之精成日靈光之精成月餘光布散分為萬象三炁之神分為三清之聖自此之後萬彙皆出皆生莫非玄元始三炁也至開皇劫分鍊三元化生諸聖至上皇劫五劫周啓五行全形化生諸真諸仙應五劫之內產生玄中之精精中之神皆名上皇故劫號上皇劫五劫之中五行正炁流方布形或聚或散或卷或舒或張或體應雲煙火霧或象類星斗金玉或形分蟲魚龍鳥皆出於赤書玉字分形自然生成三洞四輔之文龍胎石景億萬圖書三部千條局命天真皇人大真玉妃悉書其文錄為簡錄以正生成之本總括萬象之元陶鍊群品之機出產仙真之紐

三則明靈寶大法自然生成圖書總括萬象為三才機紐是茲理也

四則明大法為三洞祖教出生一切聖人自

五劫開化之後玉清洞真上清洞玄太清洞神三洞之經四輔符籙皆因赤書玉字而化稟受靈寶之炁而成昔自元始天尊命上皇三十九帝九霄天帝各紀經祝而成大洞三十九章明五劫開化源洞之體述和合三炁歸一之法付玉宸道君次於諸天說三十六部尊經後自三皇之代金闕後聖玄元老君下化神農時下化為郁默子嘗百藥分五穀而說長生經伏羲時下化為元化子正八方演陰陽說靈寶元陽經祝融時下化為鬱華子修三綱齊七政說靈寶五星混常經黃帝時下化為廣成子說靈寶道戒經少皞時化為隨應子說靈寶元藏經高辛時號元陽子說靈寶微言經帝堯時號務成子說靈寶政事經帝舜時號尹壽子說太清經靈寶赤書夏禹時號真寧子說五篇真文經龍躡經周時號郭叔子說靈寶赤精經道德二篇靈寶八威治魔經秦始皇時授以鬼林經并策役鬼神之符漢世名赤松子說三一經文帝時號河上公說道德篇章西王母奉元始之命

說靈寶三十六部尊經於武帝時下降人間授帝无上洞真洞玄洞神之教至于桓帝永壽元年又下降人間演正一太清洞神之道方成三洞皆因靈寶大法化生一切聖人也五則明人身體法元始造立混洗而自人身生聖胎法身父母交精一點含和二炁分圻先生其腎三炁分聲而生神府者心也四炁交并華蓋成形五炁交光如華五葉即五內備炁如三炁至五劫之象也二炁分判上生泥丸而下至玄谷水府也三炁火鍊上生日月如同兩目一身光明為萬象也人身正同其理夫身外形須知靈寶祖炁靈寶之炁入沙成金入石成玉禽生鸞鳳獸生玄龍草木生靈芝五穀含嘉瑞氣散成和風炁昇成慶雲炁降為甘露入水生夜光在人生聖賢以此為祖炁乃至和太一之精衆靈之首大寶既有此物如人之生形入大浮黎土丹谷中央也成行九轉分形五變而成法身乃元始十偏枯骨更生是也六則明元始祖炁无形之先比擬降質成炁

化生萬寶今世作何體狀復採鍊此炁餌之則登真正所謂靈寶之炁如萬類亦有之謂龍珠虎寶牛黃鴉丹之屬也今流精玉光丹亦是也所是靈寶之炁天地者日月之對日中之時身中者神炁會合之初故太一真人曰常於太極握樞機動靜神珠降愧幃自有靈寶生玄谷黍米空歌嘯詠時是也得此餌之必登真人之位故下仙莫能階此髣髴矣七則明大法中大洞育物回靈之道則白日登昇吹誦詠長生度世尸解得道經經中脩有萬法是寶經之指迷天中元始說經之旨趣則常理矣上有修真內鍊骨肉同飛之道中有長生度世尸解之法下有昇祖度玄之教大則保鎮天地正天宿度愈災却魔之格小則有治療沉痾回尸起死之功明則有嘯命風雷變化自然之靈幽則有策使萬靈徹視十天之文故曰備有萬法八則明大法有三品必成聖真仙道如通玄究微行諸十品上道功德合備則白日登昇若其餘修誦得一法一教長生度世為地界

洞天仙人之首或朝夕朝禮專敬奉事供養則必獲尸解之仙十洲三島散仙之民矣

靈寶无量度人上經大法卷之一

靈寶无量度人上經大法卷之二

五譯成書品

玄師曰八明可以開眼而五譯始成世書

一譯玉宇生於虛无之先隱乎空洞之中名大梵玉宇至赤明開闢火鍊成文為赤書玉

字无始以大通神威之力開廓五文而生神靈靈緯演秘而成大法也

二譯火鍊成文赤書之後字方一丈八角垂芒覆於諸天下陸西元九天之根流金之勢玉光金真之明煥耀太空无始命天真皇人

書其文名八威龍文亦曰諸天八會之書秘於上清玄都金闕七寶瓊臺及紫微上宮蘭房金室東西華堂九天太霞之府也

三譯无始天尊為道法宗主玉宸道君為靈寶教主撰此靈書五篇真文三十二天玉字

成經名靈象光明之章内王母授黃帝龍威丈人授大禹靈寶五符之法并太上後聖授

百代帝王靈寶尊經並在三十六部經内更一稱譯兼黃帝問道峨嵋親見皇人再蒙授

旨及吳左仙翁於太極徐真人降授流布亦

更不重叙為譯

四譯漢元封元年七月七日西王母下降以此經法授漢武帝帝亦不曉大梵之言王母

曰无始是大羅天人道君是西那玉國人天方與神洲之言不同况大梵之言乎遂以華

書之改天書玉字為今文以大梵之言威儀服御宮名圖書名色宮闕甲子卦爻壇式大

法之内諸品行用三十六部尊經並係漢制世文之語為古今之法言也

五譯自天真皇人悉書其文以為正音妙行真人撰集符書大法修用真定真人鑿羅真

人光妙真人集三十六部真經符圖為中盟寶錄以三十六部真經之文為靈寶大法因

此流傳吳左仙翁授經籙法談於太極徐真人仙翁遺於上清真人楊君總其玉清洞真

上清洞玄二品之經法後世漸有神文是第五譯也

齋戒節度品

玄師曰凡受行靈寶大法先須受无上下十戒